

Txirritola

ARAMAIO / Barikua / 2005eko uztailaren 8a / 158. zenbakia

KOORDINATZAILEA: Ubane Madera • Otorala Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

Santikurutze-Kanpezutik ekarri dituzte 70 kilo amuarrain, lehiaketarako

UBANE MADERA

San Martin jaien barruan, urtero egin ohi dute Arrantza Lehiaketa jaien osteko zapa-tuan, eta aurten ere hala egingo dute. Oilgor Ehiza eta Arrantza Elkar-teak guztia gertu dauka. Jakinarazi digute-nez, gaur ziren amuarrainak errekan askatzekoak.

Oilgor Ehiza eta Arrantza Elkar-teko kide Eduardo Fernandezek kontatu digunez, Santikurutze-Kanpezutik (Araba) ekarri dituzte biharko lehiaketarako amuarrainak. Gutxi gorabehera 70 kilo amuarrain askatuko dituzte Aramaio errekan. Hiruzpalau amuarrain izaten dira kilo bakoitzean, beraz, 210-280 amuarrain inguru. Hala, gaur gauean "ezkutuan" harrapatzen dituztenak kenduta, gainerakoak gaztetxoek gozamerako izango dira.

IZENEMATEA, GOIZEAN

Arrantza Lehiaketan parte hartu nahi duenak bide erraza dauka horretarako: 08:00etatik 09:00etara bitartean Ibarra joan eta antolatzaileei izena eman. Eduardo Fernandezek esan digun moduan, lehiaketan parte har-

tzeko gogoaz gainera, arrantzarako kanabera eramatearekin nahikoa da. Bestela, lehiakide bakoitzak nahi dituen tresneria guztiak eraman ditzake.

Gero, Salazandik Goikoerrotako presaraino, nahi duten lekuan bota ditzakete kanaberrak, arrantzan egiteko.

UR GUTXITXO ERREKAN

Hain zuzen ere, norberaren abilezia eta pazientzia garrantzitsuak izango dira lehiaketarako. Dena dela, Aramaio errekan orain daraman ur kantitate urria ikusita, pentsatzekoa da lehiakideek erraz samar izango dutela biharkoan amuarrainak harrapatzea.

GUZTIENDAKO SORPRESATXOA

Lehiaketa eguerdi partean bukatuko dela aditzera eman digute. Baita ere sariak izango direla, garaikurrak eta beste. Baina antolatzaileek gaineratu digute Arrantza Lehiaketa izan arren, ez dela horren garrantzitsua irabaztea, ekimenean parte hartzea, baizik. Halaber, parte-hartzaile guztiendako oparixoren bat prestatu dutela jakinarazi digute, arrantzarako materiala, hain justu: txirrikak...



210-280 amuarrain inguru askatuko dituzte gaur arratsaldean Ibarra Aramaio errekan.



Gure Historia bizi-bizi, Aramaion

Hasi eta bukatu dituzte beste urte batez Aramaio udako ikastaroak. Haiei esker, Euskal Herriko historiaren zati garrantzitsu bat aztertu dute adituek Aramaion (1789-1848 urte bitarteko historia, artea eta hizkuntza). Eta haiek entzutera ikasleak etorri dira EAetik (batez ere ibarretik) eta baita urrunagotik ere; batzuetan, egunero, 20-25 bat entzule. Modu horretan, askorendako Aramaio erreferente bilakatu da egunotan. / U.M. eta D.A.

LABUR

Gazte lokalak itxita, gertatu den istripua argitu arte

Herriko jaietan istripua gertatu da gazte lokaletan. Hain zuzen ere, jaietako bariku gauean, Arrasateko 15 bat urteko gaztea jausi egin zen lokaletako leihotik. Istripuaren ondorioz, apurdura batzuk izan ditu, besteak beste.

Horixe da orain arte dugun informazioa. Eta udaletxean ere oraindik ez dute gertatutakoa argitu. Hain zuzen ere, alkateak esan digun moduan, istripua argitu arte lokalak itxita daude eta itxita jarraituko dute.

TELEFONO JAKINGARRIAK

OSASUNA / LARRIALDIK	
Osasun etxea (txandak)	945 44 53 40
Botika	945 44 50 03
Udaletxea	945 44 50 16
Erzaintza (Arrasate)	943 79 71 99
Gurutze Gorria (Legutio)	945 45 52 52
San Martin Eskola	945 44 50 04
Taxia eta autobusak	945 44 50 33
Udal kiroldegia	945 44 53 35
Postetxea	945 44 50 83
Zuiko Eskualdea	945 43 01 67
Suhiltzaileak (Zubillaga)	943 78 28 00

AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00*	10:15	
11:00	11:15	
12:00*	12:15*	13:00
15:15	15:30	16:15
17:20	17:35	
18:30*	18:45	
20:30	20:45	21:25
21:00*	21:15	
GASTEIZ	ARAMAIO	ARRASATE
	07:50	08:05
08:15	09:00	09:15
	10:15*	10:30
	11:15	11:30
13:10	13:55	14:10
16:20	17:05	17:20
	17:35	17:50
	18:45*	19:00
19:30	20:00	20:15

OHARRA: Izartxoan duten orduetan eskaeraren arabera zerbitzua eskaintzen dute. Auzoetako bizilagunei zuzendutakoa da, eta autobusa erabili gura badute, bezperan deitu behariko dute honako zenbaki honetara: 629 54 59 23



San Kristobalera joateko gonbidapena

Uztaileko bigarren domekak agintzen duen lege, uribarriarrek San Kristobal jaia antolatu dute. Hitzordua 12:00etan hasiko da, mezarekin. Gero, pintxoak eta salda emango dituzte, eta Lagun Artean dantza taldearen saioa izango da. Auzo bazkaria ere antolatu dute, baita erromeria eta bolo-txapelketa ere. /U.M.

Baleta eta zinema saioak, Vital Kutxaren eskutik

U.M.

Musika, Dantza, Zine VITAL Araban zehar. Hala izendatu dute Vital Kutxak irailera arte antolatu duen kultura ekimena. Zuiako Koadrilako herrietan egingo dituzte ekitaldiak; Aramaion, bi egingo dituzte: uztailean eta irailean.

Ekainean, Arabako dantza erakustaldia egin zuten Aramaion. Horixe izan zen *Musika, Dantza, Zine VITAL Araban zehar* izeneko ekimenaren barruan Aramaion egin zuten lehen ekitaldia. Horren bitartez, Vital Kutxak kultura saio jakinak eskaini dizkie Zuiako Koadrilako herriei, saioak herriz herri egiteko.

HURRENGOA, DATORREN ASTEAN

Hala, euskal dantzen saioaz gainera, Gasteizko Jose Uruñuela dantza kontserbatorioko balet taldearen ikuskizuna lotu dute Vital Kutxaren kultura egitarauaren barruan. 25 bat dantzarik egiten duten ikuskizuna da. Aramaiori dagokionez, datorren uztailean 15ean egingo

dute emanaldia, 20:00etan, kultura etxean.

ZINEMA, AIRE LIBREAN

Eta hurrengo ekitaldia irailean egingo dute. Kasu horretan, Vital Kutxak aire librean zinema saioak egiteko aukera eskaintzen du, zinema mugikor baten bitartez. Hain zuzen ere, Aramaion, *Sahara* filma emango dute, irailaren 10ean, 21:00etan.

ZIGOITIKO EGITARAUA

Bestalde, Zuiako Koadrilaren barruan, Zigoitiko Zentro Sozio Kulturalan ekitaldi dezente antolatu ohi dituzte. Uztaileko ere iragarri dizkigute batzuk. Horien artean, uztailearen 15erako, antzerki saioa antolatu dute: *Don Quijote en la aventura del titiritero*. Iluntzean egingo dute.

UMORE IRLANDARRA

Eta uztailearen 22an, berriz, McCrean irlandarraren umore-saioa izango da, 20:00etan; eta 23an, Santamaria abesbatzaren emanaldia, hori ere 20:00etan.

Uztaileko egitarauarekin bukatzeko, herri bazkaria antolatu dutela iragarri digute.

BOTEPRONTOAN/ Edurne Isazelaia · Dukiena jatetxekoa

“Esaten dute hemen bizi zela tipo bat nahiko ondo bizi zena, eta esaten zioten ‘dukia’ bezala bizi zela”

Azkoaga bisitatu dugu oraingoan, han dagoelako, beste-lakoan artean, Dukiena jatetxea. Aramaioarrak zein kanpotarrak erakartzen ditu jatetxe hark. Hala kontatu digu Edurne Isazelaia. Arrasatearra da bera, baina Azkoagara ezkondu zen orain dela 17 urte. Handik gutxira, Dukienan hasi zen lanean, gizonarekin:

Orain dela 15 urte zabaldu zenuen Dukiena jatetxea?

Bai. Baserrri osoa barrutik bota egin genuen, dena aldatu, etxebizitza goian egin eta hemen, jatetxea egin genuen. **Gaur zein menu ipini duzue?** Eguneroko menua? (Barre) Gaur entsalada mistoa, menestra eta makarroiak; eta gero tripakiak, txerri-txuletak eta sardinak. **Eta zelan erabakitzen duzue zer ipini?**

Apur bat ikusita zein genero dagoen. Eguneroko desberdina egiten dugu. Entsalada egoten da beti eta gero potaje edo berdura eta okela edo arraina. **Espezialitateak baduzue?** Hori da kartako asuntua. Asteburuetan kartara egiten dugu dena. Espezialitateak? Arraina jaten da asko, arraina labean eginda; eta gero, txuletak. **Baserrriko oilasko gozoak ere ipintzen ei dituzue...**



Etxean geuk hazitakoak ditugu. Enkarguz egiten ditugu. Errepi-dearen beste aldean dugu oilategia, hortxe kanpoan egoten dira oilaskoak. Hala, enkarguaren arabera akabatu egiten ditugu. Baina oso gutxi saltzen da. Eta kartan ipinita dugu: *Baserrriko oilasko enkarguz, eta jendeak ere ikusten ditu baina...*

“Pentsatzen dut kaleko jendeak oraindik ez dakiela baserrriko oilaskoa jaten”

Bai, ala? Ba aldea egongo da oilasko arruntengandik, ezta? Bai. Baina nik pentsatzen dut kaleko jendeak oraindik ez dakiela baserrriko oilaskoa jaten. Da gogorragoa. Guk etxean jaten dugu asko. Baina jende gehienak nahiago du beste zerbait. **Dukiena izena du etxeak eta jatetxeak; duke bat bizi izan zen hemen, ala?**

Esaten dute hemen bizi zela tipo bat nahiko ondo bizi zena, eta esaten zioten *dukia* bezala bizi zela, eta hortik dator. Baina, ez pentsa, etxe txiki bat da Dukiena, pareko etxe handi horren menpekora zen. Hortaz, goitzen bat besterik ez zen. Baserrriaren izena da Azkoaga-txiki baina mundu guztiak ezagutzen du Dukiena moduan.

Hamabost urte dela hasi zineten, beste horrenbeste bai?

(Barreak) Egin beharko ditugu, bai. Ondo gabiltza, hemen bizi gara eta bizimodua hemen egiten dugu... gustura. **Aramaiokoak ala kanpokoak datoz gehiago?** Denetik apur bat. Gasteiztik ere etortzen da jende asko eta Arrasateetik eta Aretxabaletatik ere bai. Hori asteburuetan. Astegunetan oso jende gutxi ibiltzen da kartara. Menuak-eta, berriz, langileek hartzen dituzte.

OHARRAK

AIRE LIBREKO ZINEMA

Udaletik jakinarazi digute uztailean ez dutela egingo aire libreko zinema emanaldirik. Araudia falta delako hartu dute erabaki hori. Hain zuzen ere, emanaldi horiek kalean egiteak eragiten dituen zailtasunei aurre egiteko (eguraldi txarra...) araudi-rik ez dutelako.

KIROLDEGIKO LANAK

Kiroldegian hasi dira berritze lanak egiten. Orain arte, konponketa txikiak egin dituzte (berogailua...); orain, berriz, leiho eta ate berriak ipintzea falta da (segurtasuneko atekak, besteak beste). Udaleko arkitekto Haritz Maillók jakinarazi digunez, Arrasateko Argi-Plastik enpresari esleitu dizkiote lanak. Halaber, esan digu Argi-Plastik-en asmoa dela uztailean egitea lan horiek eta dagoeneko eskatuta dutela behar duten materiala. Edozelan ere, gaineratu dute uztailean hilabete txarra izaten dela, ezin dutela ziurtatu lanak uda aurretik egingo dituztenik.